

Cuira, ils 27 d'avust 2024

Communicaziun a las medias

## Nov lavuratori «Scriver litterar»

La Lia Rumantscha porscha a partir dal 2025 in lavuratori «Scriver litterar» per auturas ed auturs rumantschs, l'emprima purschida da furmaziun e da perfecziunament per scriver texts litterars en rumantsch. Il curs cumpiglia tschintg moduls tematics litterars, dat ina survista da la litteratura rumantscha e sa concentrescha sin ils differents aspects dal mastergn da l'autura u l'autur. L'annunzia per il lavuratori è pussaivla a partir dal 1. da settember enfin la fin da november 2024.

Per scriventas e scrivents rumantschs datti bainbaud ina purschida cumplessiva per emprender ed approfondar l'art da scriver texts litterars. Enfin ussa datti ina tala pussaivladad mo en las autras linguas naziunalas e betg en rumantsch. Ina realitad che la Lia Rumantscha vul midar cun porscher in tal curs a partir da l'onn 2025 er en rumantsch. Il lavuratori «Scriver litterar» è ina purschida da furmaziun e da perfecziunament per auturas ed auturs rumantschs. Ella pussibilitescha a las participantas ed als participants da chattar e precisar lur agen scriver litterar. La purschida sa drizza a persunas rumantschas che han gia fatg emprimas experientschas da scriver texts litterars e che vulan approfondar quellas. La furmaziun è er adattada per persunas che scrivan gia professiunalmain en auters champs e vuessan sviluppar vinavant lur abilitads. Persunas entusiasmadadas da la litteratura che vuessan scuvrir vias novas cun scriver èn era bainvegnidas – independentamain da la vegliadetgna, da la furmaziun e da l'idiom.

### Tschintg moduls tematics

Planisads èn tschintg moduls tematics che dattan ina survista da l'uschenumnà canon litterar rumantsch e sa concentreschan sin il mastergn dal scriver. Suentar avair frequentà questa part tematica approfundeschan las participantas ed ils participants cun sustegn da la gruppa e da menturas u menturs lur projects litterars individuals.

Ils moduls tematics vegnan manads da docentas e docents versads. L'emprim modul «Experiment» vegn concepì da l'autura ed artista Flurina Badel, il modul «Prosa» vegn manà da l'autur Leo Tuor, il modul «Scriver texts scenics» da la dramaturga Selina Beghetto ensemen cun l'autur Lukas Bärzfuss, la «Lirica» maina il poet Dumenic Andry ed il modul «Scriver e publitgar texts plurilings» l'autur e professor per didactica da plurilinguitad integrada a la scola auta da pedagogia dal Grischun, Vincenzo Todisco. Il team vegn cumpletà da las auturas Simone Lappert, Christina Viragh e Li Mollet sco docentas envidadas. Il professor per litteratura e cultura rumantscha a l'Universitad da Turitg Rico Valär maina la part dal «Canon rumantsch».

Questa purschida da la Lia Rumantscha vegn sustegnida finanziailmain e concepziunalmain da la Fundaziun svizra per la cultura Pro Helvetia.



# Lia Rumantscha

## Survista dals termins

A partir dal 1. settember 2024 pon ins s'annunziar per il lavuratori da quatter semesters che cumenza il schaner 2025, cumpiglia bundant 30 sondas ed in tschert temp da lavur vi dals projects litterars individuals ils onns 2025 e 2026. Las vacanzas da scola vegnan resguardadas uschè bain sco pussaivel. Infurmaziuns, termins, descripziuns dals moduls e l'andament per l'admissiun chatt'ins sin [www.liarumantscha.ch](http://www.liarumantscha.ch).

## Contact

Lia Rumantscha

Gianna Olinda Cadonau

manadra Cultura

Via da la Plessur 47 | 7001 Cuir

telefon +41 (0)81 258 32 22 | telefonin +41 (0)76 447 33 80

e-mail: [gianna.cadonau@rumantsch.ch](mailto:gianna.cadonau@rumantsch.ch)